

ԳԱՌՆԻԻ ՄԻ ՔԱՆԻ ԱՐՁԱՆԱԳՐՈՒԹՅՈՒՆՆԵՐԸ
ՊԱՏՄԱ-ՀՆԱԳԻՏԱԿԱՆ ԱՌՈՒՄՈՎ (XIII—XIV դդ.)

ՀԱՄԵՏ ՊԵՏՐՈՍԱՆ

Միջնադարյան Գառնիի տնտեսության, առևտրի, սոցիալական կյանքի որոշ կողմերի քննության համար կարևոր են գյուղաքաղաքի տարածքում գրտնըվող ճարտարապետական հուշարձանների վրա փորագրված արձանագրությունները, որոնք հիմնականում վերաբերում են XIII—XIV դդ.: Այս ժամանակաշրջանի մի շարք աղբյուրներում Գառնին հիշատակվում է որպես բավականին մեծ բնակավայր՝ գյուղաքաղաք կամ քաղաքագյուղ, շահաստան դղյակ, նույնիսկ քաղաք և մայրաքաղաք¹: Մատենագրական և արձանագրական տեղեկությունների համադրումը Գառնիի պեղումներից գտնված նյութական մշակույթի արժեքների հետ² հնարավորություն է բնձնում ուսումնասիրելու այդ գյուղաքաղաքի տնտեսամշակութային և սոցիալական կյանքը: Անդրադառնանք մեզ հետաքրքրող արձանագրություններին:

Գառնիի հեթանոսական տաճարի վրա գտնվող Խոշաք իշխանուհու և նրա որդի Զաքարիի հայտնի արձանագրությունն ամբողջությամբ հրատարակել է Բ. Առաքելյանը³: Ահա այդ արձանագրության՝ մեր խնդրին առնչվող մասը. «Զն [1291]: թվ[ական]յութեան... [ես] Խոշաք... եւ իմ որդին Ամիր Զաքարէ գիր տուաք Գառնո մեր սեփական հայրենեցս, որ եզն: ԺԱ: սպ: շարիատ էր եւ :Ի: ոչխարն :Ա: բայլխահակ, եւ մեք վերուցաք զայս հարկ... ազատեցաք զեզն և զոչխար յամենայն հարկաց: Վերուցաք և զգինո բաժ...»⁴: Հաջորդը՝ Հովհաննեսի և Վանականի արձանագրությունն է Սունպենց վանքից. այն տեղեկացնում է. «ԶԿԴ [1315]: թվ: Շնորհիւն այ, ես Յոհաննէս որդի Տիրատրո եւ ես Վանականս/ որդի Յովանիսի՝ Գառնո տամղատարքս /վասն մեր պարոնացն յերկար կենդանութեան/ եւ մեր հոգոյս համար. մեր տանուտէր/ացս բանիւ. Կարապետին, Ածատրո/ի, Խոյտամիւն, Ասխաթանա, Ամէնատ[րոյ]/, Միքէլին, Սէթին, Վարդին, Մէլիք[չ]/անին եւ այլ մեծ ու փոքր տանուտէր/ացս//, վերուցաք զՍունպենց վանի/ցս] զհասարակաց գինո եւ զ[ամեն]այն/ ցեղ վաճառի տամղա եւ զչա[ղ]/ացի մահկանա, որ սբ Ածածնիս լուսացա լինի: Եւ թէ ոք ի քրիստոնէից/ կամ այլազգեց, որ յայս կա/պալիս վերա լինի ու զմեր աւանդս խ/սփանել ջանա ու զմեր հոգիս զր/կէ, զրկեսցի նա յողորմութենէն/ այ եւ յամե-


1 Կիրակոս Գանձակեցի, Պատմություն Հայոց, աշխատասիրությամբ Կ. Ա. Մելիք-Օհանջանյանի, Երևան, 1961, էջ 81—82, 225, 348, «Մեծիւն Վարդանայ Բարձրբերդցւոյ Պատմութիւն Տիեզերական», ի լոյս ընծ. Մ. Էմին, Մոսկվա, 1861, էջ 188, Գ. 2 ս վ ս ե փ յ ա ն, Հավուց Քառի Ամենափրկիչը և նույնանուն հուշարձանները հայ արվեստի մեք, Երուսաղեմ, 1937, էջ 16, «Աշխարհացոյց Վարդանայ վարդապետի», Փարիզ, 1960, էջ 31, «Մանր ժամանակագրություններ, XIII—XVIII դդ.», կազմեց Վ. Ա. Հակոբյան, Կ. 1, Երևան, 1951, էջ 39, Կ. II, 1956, էջ 334, 336, «ԺԴ դարի հայերեն ձեռագրերի հիշատակարաններ», կազմեց Լ. Ս. Խաչիկյան, Երևան, 1950, էջ 351:

2 Գառնիի պեղումները սկսվել են 1949 թ. և շարունակվում են մինչև այսօր, ահագ. Բ. Առաքելյանի գլխավորությամբ: Միջնադարյան նյութերի մի մասը հրատարակված է (տե՛ս Ե. Ն. Արակելյան, Гарни 1, Ереван, 1951, с. 69—87, Բ. Ն. Առաքելյան, Գ. 2. Կարախանյան, Գառնի, III, Երևան, 1962 (այսուհետև՝ «Գառնի»):

3 «Գառնի», էջ 45:

4 Արձանագրությունն առաջին անգամ որոշ տարբերություններով հրատարակել է Գ. Հովհաննիսյանը (տե՛ս Գ. Հովհաննիսյան, Գառնիի ավերակները. «Հովիտ», 1910, № 8, էջ 122):

նայն սրրոց յերկնաւորաց եւ յերկրաց անէծս առջէ եւ յամենն ազգ նաւաթ լիցի եւ ի մեծ/ պարոնաց խոռվութիւն] անգանիս⁵: Նույն վանքի բակում ա. Աստվածածին եկեղեցուն պատկանող սրբատաշ մի քարի վրա պահպանվել է մի այլ արձանագրություն (թերի), որը, դատելով տառաձևերից և իմաստից, դարձյալ վերաբերում է XIII—XIV դդ.: Ահա այդ արձանագրությունը. «...[մ]եր պարոնացն յերկար կենդանութ[եան] [եւ] մեր հոգոյս համար վէրո[ւ]ցաք զվանա/ցս զջաղացի խարաճ և զդահս, / կատէպանի հակ, զկթանա հակ, զվ[ե]ցկո թաղար և այլ զ[ի]նչ ձեռնա...»⁶ (տե՛ս նկարը): Այս արձանագրու- թյունը ևս վերաբերում է Սունպենց վանքին և հավանաբար կազմել են տամ- ղատարները:



Վերոբերյալ երեք արձանագրությունները, ինչպես նաև ստորև նշվածները, վկայում են գյուղաքաղաքի բարձր զարգացած երկրագործական և անասնա- պահական տնտեսության մասին: Գառնիի ընդարձակ հողահանդերը հիմնակա- նում փոխած էին բնակավայրից դուրս տարածվող հարթություններում և Ազատ գետի ձորերում: Արձանագրություններում այդ հողահանդերը հիշատակվում են տարբեր անվանումներով: Հոգևոր կենտրոններին արված նվիրատվությունների մեջ ամենից հաճախ հանդիպում ենք այգիներին⁷: Այսպես, 1317 թ. մի արձանա- գրության համաձայն ոմն Խերխաթուն և նրա Ամիր որդին Սունպենց վանքին են նվիրել Թամզո տակ վայրում գտնվող փրենց այգին՝ փոխարենը ստանալով

⁵ Արձանագրությունն երիցս գրավել է հետազոտողների ուշադրությունը: Առաջին անգամ մի քանի տող, և այն էլ ազավաղված, հրատարակել են Սիսոնև ու Քուլուկ Հովհաննիսյանը (տե՛ս «Материалы по археологии Кавказа», вып. 13, М., 1916, с. 35): Տարբեր առիթ- աներով այս արձանագրությանն անդրադարձել և որոշ հատվածներ հրատարակել է Բ. Առա- քելյանը (տե՛ս «Գառնի», էջ 46, Բ. ն. Առաքելյան, Փաղաքները և արհեստները Հա- յաստանում IX—XIII դդ., հ. 2, Երևան, 1964, էջ 158): Արձանագրության լրիվ տեքստը, «մահականա տերմինի մեկնաբանման կապակցությամբ, հրատարակել է Գ. Գրիգորյանը (տե՛ս Գ. Գրիգորյան, Դիտողություն միջնադարյան մի տուրքի մասին, «Պատմա-բանասիրա- կան հանդես», 1963, № 2, էջ 262):

⁶ Արձանագրությունը հրատարակվում է առաջին անգամ:

⁷ Գառնիի զարգացած այգեգործական տնտեսության մասին տեղեկություններ են հասել նաև IX—X դդ. (տե՛ս «Պատմութիւն նահանգին Սիսական, արարեալ Ստեփանոսի Օր- բէլեան, արքեպիսկոպոսի Սիւնեաց, Թիֆլիս, 1910, էջ 174, 179, այսուհետև՝ Ստեփա- նոս Օրբէլեան):

երեք պատարագ⁸, Հեթանոսական տաճարի մոտ կառուցված Մաշտոցի մատուռի քահանա Մխիթարը այդ մատուռին է նվիրել «...գլխի» [S]անծո լանջի ագին...»⁹։ Գառնեցիները երաշխավորում են նվիրել իրենց «այգին ի նականան ձորի»՝ փոխարենը ստանալով մեկ պատարագ։ Վարելահողերը հիշատակվում են «հող» բառով։ XIV դ. սկզբի մի արձանագրության համաձայն գառնեցի միաբան խուրովաթարը Սունպենց վանքին է նվիրել իր «Արտագոյնո հողն»¹⁰, Մի ուրիշ արձանագրության մեջ նշվում է, որ վանքին է նվիրվել «Հայրենիք հողն», որը գտնվում էր «յնպեհնց հողին գլխին»։ Նույն ժամանակի մի այլ արձանագրության մեջ հողահանգը հիշատակվում է «խուպան» բառով՝ անմշակ, կորզ հողի իմաստով¹¹։ Գյուղաքաղաքից ոչ հեռու գտնվող Հավուց Թառի մի արձանագրության մեջ նշվում է, որ վանքին է նվիրվել «Բ: աղբին», այսինքն երկու պարարտացված հողակտոր։ Միջնադարյան Հայաստանում բավականին տարածված էր հողերի պարարտացումը։ Այն կիրառվում էր նաև Գառնիի ձորերում։ Տեղեկություններ կան նաև նոր գցված մատղաշ այգիների մասին, որոնք հիշվում են «նորք» անվան տակ։

Գառնիի երկրագործական տնտեսության մասին կողմնակի վկայություն է պատկերացնում հակառակը։ «Կատեչականի հակ» կապակցությունը Գառնիի արձանագրության (տե՛ս նկարը) մեջ հանդիպում է առաջին անգամ և այլուր վկայված չէ։ Կատեչական (կատապան—կատպան տարբերակներով) բառը միջին դարերում կիրառվել է երկու իմաստով. ա) կողմնակալ, կոտակալ, քաղաքապետ և բ) այգեպան, այգու պահպան¹², կատեչական էին կոչվում Անիում Բյուզանդիայի

⁸ Արձանագրությունը փորագրված է Սունպենց վանքի ս. Առավածածին եկեղեցուն հարավի կից կառուցված որմնափակ խաչարի հյուսիսային կողմին։ Բերում ենք արձանագրության լրիվ տեքստը, քանի որ Սիստեն ու Փուլոսի Հովհաննիսյանը հրատարակել են զգալի բացթողումներով ու աղավաղումներով («Материалы по археологии Кавказа», с. 35—36), Եվածին (Է) այ, ես եղևաթունս եւ իմ որդիս Ամիրս յմխարանաք ար Ածածինո տաւաք զմեր հայրենի այգին ի Թամզո տակին ընծա մեր գէրեզմանատանս յՍունպենց վանիցս եւ մխարանքս խոստացան ի տարւոյն :Գ: ալ պտտարագել զԹ :Բ: ալն ինձ և :Ա: Ամիրսիլ: Ով որ հանել շանս զայգիս յեկեղեցոյս, մասն զՅուզայի առց է ե յերից :սր: ծղ: անիծ[հաւ] լից[ի]: ԶԳՁ Թ.Ձ:

⁹ Գ. Հովսեփյանն այս հատվածը կարդացել է. «էտու [տ....] անծուան առչի ագին» (Գ. Հովսեփյան, Գառնիի ավերակները, էջ 122). «Տանծո լանջ» տեղանունը հանդիպում է նաև Հավուց Թառի մի արձանագրության մեջ, որը Մանկունին (տե՛ս ավերակն տարեգիրք, կազմեց Կ. Կոտանյան, Ս. Պետրոսով, 1913, էջ 136) և Գ. Հովսեփյանը (տե՛ս Գ. Հովսեփյան, Հավուց Թառի Ամենափրկիչը..., էջ 23), կարդացել են շեղումներով։ Արձանագրության ստույգ տեքստը հրատարակել է Ս. Ավագյանը (տե՛ս Ս. Ա. Ավագյան, Վիճակն արձանագրությունների բառարանություն, Երևան, 1978, էջ 314)։

¹⁰ «Արտագոյն» բառն այլ արձանագրություններից հայտնի չէ։ Երեմիա վարդապետն այն մեկնում է որպես «բացազոյն» («Բառագիրք հայոց արարեալ ի սբ էջմիածին Երեմիա վարդապետէ», Կ. Պոլիս, 1728, էջ 54), Թերևս «ավելի հեռու, ամենահեռու իմաստով (տե՛ս «Նոր բառգիրք հայկազան լեզուի», հ. 1, Վենետիկ, 1836, էջ 470. (այսուհետև՝ ՆՀԲ), Հր. Աճառյան, Հայերեն արձատական բառարան, հ. I, Երևան, 1971, էջ 403, Սա. Մալխասյանց, Հայերեն բացատրական բառարան, հ. I, Երևան, 1944, էջ 352)։ Այս արձանագրության մեջ այն դրված է սեռական հոլովով (Արտագոյնո) և ավելի հավանական է, որ տեղանուն է՝ առաջացած Թերևս Գառնիի հանդերձ ծայրում, վերջնամասում գտնվելու պատճառով։

¹¹ Գ. Հովսեփյան, Խաղբակյանք կամ Պոռչյանք հայոց պատմության մեջ, Անթիլիաս, 1969, էջ 322։

¹² ՆՀԲ, հ. 1, էջ 1061, Ս. Ամատունի, Հայոց բառ ու բան, Վաղարշապատ, 1912, էջ 332, Հր. Աճառյան, Հայերեն գավառական բառարան, Քիֆլիս, 1913, էջ 554, նույնի՝ Հայերեն արձատական բառարան, հ. II, Երևան, 1973, էջ 537, Սա. Մալխասյանց, Հայերեն բացատրական բառարան, հ. II, Երևան, 1944, էջ 398—399։

նշանակած կառավարիչները: Անին Արփասլանի կողմից դրավձելուց հետո այդ տիտղոսով հիշատակված պաշտոնյայի այլևս չենք հանդիպում: XIII դ. սկսած այն ավելի հաճախ կիրառվում էր երկրորդ իմաստով¹³, «Կատեչպան» տերմինը հանդիպում է նաև Հավուց Քառի մի արձանագրությունում. «Սո Գրի-գոր Կատեչպանս էտու :ն: դ: Ի սբ ուխտս եւ սպասատրքս գրեցին ինձ :բ: ժամ ի տարուջն...»: Արձանագրության առաջին հրատարակիչ Գ. Հովսեփյանը այն վերագրել է XIII դ.: Տարակուսելով, որ դժվար թե այդ տերմինը օգտագործվել է կուսակալ իմաստով, հեղինակը գրում է. «Ժողովրդական դավառաբարառի հետ կապված չէ՞ ընծայաբեր Գրիգորի այդպիսի կոչումը: Արարատյան բար-բառով «կատեչպան» նշանակում է այգեպան...»¹⁴, XIII—XIV դդ. Զաքարյան-ների մոտ «կատեչպան» պաշտոնյայի գոյության մասին (և առավել ևս նրա օգ-տին հավաքվող հարկի մասին) ոչ միայն ուղղակի, այլև անուղղակի ոչ մի տե-ղեկություն չի պահպանվել: Ավելի հավանական է, որ վերջին երկու արձանա-գրություններում էլ այն, ինչպես որ մատենագրական համաժամանակյա մի շարք աղբյուրներում է, ունի այգեպան իմաստը: Մյուս կողմից էլ պարզ է, որ «կատեչպանի հակը» ոչ թե կատեչպանի օգտին (ինչպես ասենք «Ճեռնավորահա-կը», «Եամիրահակը», «Ղեմմէթէրահակը») ¹⁵, այլ կատեչպաններից, այսինքն այ-գեպան-այդետերերից հավաքվող հարկ էր: Տվյալ դեպքում վանքն է հանդես գալիս որպես այգետեր, և «կատեչպանի հակն» էլ վանքին պատկանող այգինե-րից գանձվող հարկն էր:

Քննվող ժամանակաշրջանում այգիների եկամտից գանձվող հարկը բազ-միցս վկայված է վիճաբերում: Այսպես, Փարպիում 1264 թ. հիշատակված է «ղՄարպոյ այգեաց շարիատն»¹⁶, Ավանի 1285 թ. և 1287 թ. արձանագրություն-ներում՝ «զԱւանայ գայգեաց շարիտն»¹⁷, Մրենի 1273 թ. մի արձանագրության համաձայն Արջուառիճ վանքի՝ Մրենում և Օշականում ունեցած այգիներն ա-զատվել են «ի խալաէ»¹⁸, Նույն Մրենում 1288 թ. հիշատակվում է «զէգեց գինո և խաղողի խալէն»¹⁹, իսկ Հովհաննավանքում՝ «վանաց էգոց հողին շարինա-տը»²⁰: Ինչպես տեսնում ենք, նույն հարկն արտահայտող բառակապակցություն-ները տարբեր տեղերում միանման չեն: Այս բազմազանությունը նկատի ունե-նալու դեպքում «կատեչպանի հակի» եզակի օգտագործումը Գառնիում կարելի է դիտել որպես հարկային տերմինների տեղայնացման արդյունք:

Գառնիի անասնապահական տնտեսության մասին տեղեկությունները ա-վելի սահմանափակ են: Երկրագործության մեջ վճռական դեր էր խաղում քա-շող ուժը՝ սովորաբար եզը: Եվ պատահական չէ, որ Զաքարյան իշխանների ար-ձանագրության մեջ, որպես կարևոր բարեգործական քայլ, հիշատակվում է հե-տևյալը. «Եթե մինչ այդ մեկ եզի համար որպես շարիատ» վերցվում էր տասնը-մեկ սպիտակ (արծաթյա) դրամ, ապա Զաքարյանները գառնեցիներին ազատե-ցին այդ հարկից: Ըստ Մխիթար Գոշի Դատաստանագրքի՝ «Եզին այլ հարկ մի լիցի, զի այն իսկ է, զոր աշխատեալ հնգեկի»²¹, Փաստորեն եզներից գանձվող հարկն անուղղակի հարկ էր և, ինչպես հուշում է հարկերի վերացման փաստը,

13 «Կատապան» բառի տակ Հր. Աճառյանը բերել է նաև բոլոր այն մատենագրական տե-ղեկությունները, որտեղ բառը հանդես է գալիս «այգեպան» իմաստով և շեշտել, որ վերջին իմաստը այն ստացել է ավելի ուշ (Հր. Աճառյան, Հայերեն արձատական բառարան, Կ. II, էջ 537):

14 Գ. Հովսեփյան, Հավուց Քառի Ամենափրկիչը..., էջ 16:

15 Ս. Ա. Ավագյան, Նշվ. աշխ., էջ 163—172:

16 «Վիճական տարեգիր», էջ 107:

17 Կ ար օ Ղ ա ֆ ա դ ա ղ ր յ ա ն, Երևան, Միջնադարյան հուշարձանները և վիճական ար-ձանագրությունները, Երևան, 1975, էջ 195,

18 «Վիճական տարեգիր», էջ 116:

19 Նույն տեղում, էջ 130:

20 Նույն տեղում, էջ 142:

21 Մ խ ի Թ ա ղ Գ ո շ, Գիրք Դատաստանի, Երևան, 1975, էջ 32՝ (այսուհետև՝ Մ խ ի Թ ա ղ Գ ո շ):

այս և այլ անուղղակի հարկերի գանձումը քայքայման եզրին էր հասցնում գյուղաքաղաքի ինչպես անասնապահական, այնպես էլ երկրագործական տընտեսությունը: Գառնիին տեղագրված լինելով նախալեռնային գոտում, ուներ բուսոր հնարավորությունները ոչխարաբուծության համար, որի զարգացումը չկասեցնելու նպատակով Ջաքարյանները գիջում են որոշ հարկեր՝ Ուխարներից միայն որպես «բալախահակ», այսինքն իշխանական արոտավայրերում արածեցնելու դիմաց գանձվող հարկ²², վերցվում էր քսան ուխարից մեկը (արձանագրության մեջ՝ «Ի: ուխարն: Ա: բալախահակ»): Որ եզներից ու ուխարներից գանձվել են և այլ հարկեր, վկայում է Նոռաք իշխանուհու արձանագրության «ազատեցաք զեզն և զուխարն ամենայն հարկաց» արտահայտությունը: Գառնիի նորահայտ արձանագրությունում հիշատակված է նաև «Կթանահակ» տերմինը, որը այլ արձանագրություններից մեզ հայտնի չէ: Նոր Հայկազյան բառարանը «Կթան» բառը բացատրում է որպես «Կենդանի յորմէ կթի կաթն, կաթնաբեր անասուն»²³, Այս բառի տակ նույն իմաստն են դնում համարյա բոլոր բառարանագիրները²⁴, Կթան անասուններից ամենակարևորը կովն էր, որից գանձվող հարկերի մասին կան մատենագրական և արձանագրական տեղեկություններ: Ըստ Մխիթար Գոշի Դատաստանագրքի՝ «Կովու լիոր եղն միայն լիցի»²⁵: Անիի և Շիրակավանի XIV դ. մի քանի արձանագրություններում²⁶ կովերից գանձվող տուրքն անվանված է «զկովին համրբելէ» կամ «համարբելէ» (այսինքն՝ համրբելուց, հաշվելուց)²⁷, Բջնիում՝ «զկովայհամարն»²⁸, իսկ Օձունի 1275 թ. մի արձանագրության մեջ հիշատակվում է «զկովի գլխահակը»²⁹, Այստեղ դարձյալ ակնառու են նույն տուրքի անվան տեղական տարբերակները՝ «Կովում է, որ Կթանահակն» էլ կովերից գանձվող տուրքն էր, շնայած լայն առումով այն կարող էր նշանակել ոչ միայն կովերից, այլև կթան այլ անասուններից գանձվող հարկ:

Անասնապահական տնտեսության մասին որոշ նյութ են տալիս պեղումները: Ծիշտ է, Գառնիում պեղված բնակելի-տնտեսական համալիրներում դրժվար է տարբերակել գոմը կամ համանման կից կառույցները, սակայն XII—XIV դդ. շերտերում հաճախակի հանդիպող ձիու, ալանակի, եզան պայտերը, սանձերի մասերը և ձձոմների բեկորները վկայում են, որ անասնապահությունը գյուղաքաղաքի տնտեսության կարևոր ճյուղերից մեկն էր:

Ջարգացած երկրագործական տնտեսությունն իր հերթին ենթադրում է երկրագործական մթերքների վերամշակման արտադրական կառույցների առկայություն: Հետաքրքիր տեղեկություններ են պահպանվել հատկապես ջրաղացների մասին: Գառնիի տամղատարներ Հովհաննեսը և Վանահանը վերացրել են Սունպենց վանքից գանձվող զաղացի մահկանանս: Վերոբերյալ նորահայտ արձանագրության համաձայն հօգուտ նույն վանքի թողնվել է «զաղացի խարած եւ զդահանս»: «Դահան» տերմինը որպես ջրաղացից գանձվող հարկ հանդիպում է նաև Անիի մի արձանագրության մեջ. «զաղացնոյս ամէնոյ զդամղէն և զդահակ»³⁰, Եթե ընդունելի է, որ խարաչը, տամղան և մահկանան ջրաղացի հետ դրվելիս կարող էին նշանակել եկամտահարկ (կամ վարձ)³¹, ապա պարզ չէ, թե

22 Б. Н. Аракелян, Гарни, I, с. 84, У. Ա. Ավագյան, նշվ. աշխ., էջ 37—38;
 23 նշվ., էջ 1095;
 24 Հ. ր. Աճառյան, Հայերեն գավառական բառարան, էջ 568, նույնի՝ Հայերեն արձատական բառարան, հ. II, էջ 585, Ստ. Մալխասյանց, Հայերեն բացատրական բառարան, հ. II, էջ 433;
 25 Մխիթար Գոշ, էջ 32;
 26 Հ. Ա. Օրբելի, Գիվան հայ վիճագրության, պրակ 1-ին, Անի քաղաք, Երևան, 1966:
 էջ 27, 28, «Վիճական տարեգիր», էջ 247;
 27 Ս. Ա. Ավագյան, նշվ. աշխ., էջ 175;
 28 «Վիճական տարեգիր», էջ 226;
 29 Ս. Ա. Ավագյան, նշվ. աշխ., էջ 174;
 30 Հ. Ա. Օրբելի, նշվ. աշխ., էջ 28;
 31 Գ. Գրիգորյան, նշվ. աշխ., էջ 263, Ս. Ա. Ավագյան, նշվ. աշխ., էջ 121:

ինչ է նշանակում դահը կամ դահեկը³², Կարելի է ասել միայն, որ ջրաղացից գանձվող հարկը իր մեջ կարող էր ներառնել նաև մի այլ հարկ, որը կամ եկամտահարկի մի մասն էր, կամ էլ դրանից տարբերվող մի այլ տուրք, որը միշտ չէ, որ գանձվում էր (Շիրակավանի 1231 թ. մի արձանագրության մեջ հիշատակվում է միայն «գլխարած ջողջաց»-ը³³, իսկ Գրանիում, ինչպես տեսանք՝ միայն «ջրաղացի մահկանա»-ն)։ Սույնպես Վանքի մի արձանագրություն հայտնում է. «Յուսով բարեբարին այ, ես Ստեփաննոս/ Յովհաննիսեանց ետու :Գ: ար ջաղաց ի սբ/ Ածածինս եւ սպասաւորք սբ ուխտիս խո/ստացան :Բ: ար պատարագ ի տարին կատարեն»³⁴, Տվյալ դեպքում վանքը դառնում է ոչ թե սեփականատեր, այլ, «փոխհատուցելով» լայնորեն վաճառվող պատարագներով, իրավունք է ստանում շաբաթական երեք օր տնօրինել ուրիշ սեփականատիրոջ ջրաղացը: Եթե հաշվի առնենք, որ միջին մեծության մի հազի կամ վարելահող նվիրաբերելու դեպքում էլ ստանում էին երկու պատարագ, այս պարզ կդառնա, թե ինչպիսի եկամտաբեր կառույցներ էին ջրաղացները³⁵: Զրաղացները, ինչպես ցույց են տվել հնագիտական դիտումները, տեղադրված էին Ազատ գետի երկայնքով՝ Գրանիի կիրճում: Մինչև այսօր էլ Հավուց Թառ տանող կամրջի մոտերքում պահպանվել են դրանցից մի քանիսի ավերակները:

Գրանիի ձիթհանություն մասին համարյա տեղեկություններ չկան. ինչպես կարելի է մակաբերել Հովհաննեսի և Վանականի արձանագրությունից, գլուղաքաղաքի տամղատարները վանքից գանձվող որոշ հարկեր վերացրել են, «որ սբ Ածածինս լուսացու լինի», այսինքն եկեղեցին կարողանա հոգալ լուսավորման համար օգտագործվող ձիթի ծախսերը: Միջնադարյան եկեղեցիներում օգտագործվող ջրեղ ջահերի, աշտանակների մասին պահպանվել են ուշագրավ մատենագրական տեղեկություններ³⁶, «Բաղմաչք», հնարամիտ կառուցվածքով և վարպետ հարգարումով եկեղեցական ջահեր և աշտանակներ են գտնվել Անիի պեղումների ժամանակ³⁷, 1965 թ. Գրանիի բազիլիկ եկեղեցու պեղումների ժամանակ գտնվել է կավե գլանաձև ջահի մի մաս, որը հավանաբար ունեցել է ութ լուսատու կետ: Պահպանվել են այդ կետերից միայն երկուսը. դրանք եռանկյունաձև, կլոր անկյուններով թասեր են՝ ամրացված գլանաձև սնամեջ իրանին: Զահը կարելի է թվագրել XII—XIV դդ.³⁸: Որ իսկապես եկեղեցիների լուսավորության համար մեծ քանակությամբ ձիթ էր ծախսվում և որ լուսավորության հարցը գտնվում էր հոգևորականների ուշադրության կենտրոնում, կարող է

32 Տվյալ դեպքում խոսքը բառի հարկային իմաստի մասին է: Ինչպես ցույց է տվել Չր. Աճառյանը, դահեկ-դահիակը փոխառություն է պարսկերենից՝ կազմված dah—տաս և yakh—մեկ բառերից ու նշանակում է տասից մեկը, տասանորդ (Չր. Աճառյան, Հայերեն արմատական բառարան, հ. I, էջ 615): Դահի կամ դահիակի երկու առանձին վկայությունների մանրամասն ֆեուկայան շնորհիվ Ս. Ա. Ավագյանը հաստատել է, որ այն երկու դեպքում էլ առևտրական գործարքից տեղական իշխանի, կալվածատիրոջ կամ պարոնի օգտին գանձվող հարկ էր, թերևս վաճառքի ընդհանուր գումարի մեկ տասներորդը (տե՛ս Ս. Ա. Ավագյան, նշվ. աշխ., էջ 62): Այն մեր դեպքի հետ չի կապվում:

33 «Վիմական տարեգիր», էջ 74:

34 Այս Ստեփանոս Հովհաննիսյանցը մի նվիրատվական արձանագրություն էլ ունի Հավուց Թառում (Գ. Հովսեփյան, Հավուց Թառի Ամենափրկիչը..., էջ 25):

35 Բ. Ավդալբեգյանի հաշվումներով քննվող ժամանակաշրջանում մեկ պատարագն արժեր մոտ 20—25 դահեկան (տե՛ս Բ. Ավդալբեգյան, Մի գաղտնիք հայ վիմական արձանագրությունների մեջ ու նրա նշանակությունը Հայաստանի տնտեսական զարգացման պատմության համար, «Հայագիտական հետազոտություններ», Երևան, 1969, էջ 319):

36 Տե՛ս Բ. Ն. Առաքելյան, Քաղաքները և արհեստները Հայաստանում IX—XIII դդ., հ. I, Երևան, 1958, էջ 165:

37 И. А. Орбелн, Избранные труды, Ереван, 1963, с. 47—49, рис. 9.

38 Նման «ջահ» հայտնի է նաև Անիից (տե՛ս И. А. Орбелн, նշվ. աշխ., էջ 67, նկ. 11):

վկայել նաև Ստ. Օրբելյանի մոտ տեղ գտած մի անվավեր պատմություն, ըստ որի հոտաղ տղաների՝ «կնիւ» կոչվող բուսից հյուսած և մի քարի վրա գրած խաչի տակից ձեթի աղբյուր է սկսում բխել, որի վրա էլ կառուցում են կնէվանքը. քրայց գտեղի կնիւնի թողին ի մեջ եկեղեցւոյն փոս մի դուզնաքեայ և մինչ յանր տեղւոյն ձէթ բղխէր ի փոսոյն այնքան՝ զի օտար ձիթոյ ոչ կարօտանային, այլ եկեղեցւոյն կանթեղունքն նույաւ կերակրիր»³⁹:

Գառնի գյուղի կենտրոնում պահպանվել են մի ձիթհանի պատերը և կալաքարը: Պատի այն մասը, որտեղ ամրացվել են մամլիչի հեծանները, շարված է XIII—XIV դդ. բնորոշ մշակում և արձանագրություն ունեցող խաչքարերով: Զիթհանը հավանաբար կառուցվել է XIV—XV դդ.: Գյուղաքաղաքը ձեթի մեծ պահանջներ ուներ ինչպես լուսավորության, այնպես էլ սննդի և տնտեսական այլ նպատակների համար: Այսպիսով ձիթհանությունը նույնպես իր կարևոր տեղն ուներ Գառնիի բազմակողմ տնտեսության մեջ:

Գյուղաքաղաքի տնտեսության քննության համար կարևոր է ապրանքային արտադրության հարցը, որի շահանիշը առևտուրն է (հատկապես ներքին)՝ նրա ծավալը, ապրանքների տեսականին, կազմակերպման մակարդակը: Եթե հացամթերքների, անասնապահական արդյունքների, ձեթի մասնակի ապրանքային բնույթը ենթադրելի է (ինչպես տեսանք, Սունպենց վանքը լուսավորության համար ծախսվող ձեթը գնում էր), ապա այգեգործական արդյունքների և առաջին հերթին գինու ապրանքային բնույթը հավաստում են ինչպես արձանագրական, այնպես էլ հնագիտական նյութերը:

Գառնիի ամրոցի տարածքում պեղված XI—XIV դդ. բնակելի-արտադրական համալիրների անբաժանելի մասն են կազմում հնձանները՝ խաղող ճրգմելու հատուկ հարթակներով, կրաշաղախով մաքուր սվաղած գինու հորերով և մառաններով: Գինու հորերն ունեն տարբեր շահեր. դրանց միջին տարողությունը տատանվում է 1,5—3 հազար լիտրի սահմաններում: Մեկ հնձանը սովորաբար բաղկացած է մեկ կամ երկու հորերից, 3—8 կարասներից⁴⁰, Գինու այսպիսի մեծաքանակ պաշարների առկայությունը մեկ բնակելի համալիրում, անշուշտ, հավաստում է նրա ապրանքային բնույթը: Այս իրողության հետ համահնչուն են Գառնիի առևտրի մասին հայտնի երկու արձանագրական տեղեկությունները (հողաք իշխանուհու արձանագրության մեջ՝ «...վերուցաք... զհասարակաց գինո և զամենայն ցեղ վաճառի տամղա», այսինքն՝ ինչպես գինու, այնպես էլ վաճառվող այլ ապրանքներից զանձվող առևտրահարկը)⁴¹, որոնք վերաբերելով նույն ապրանքին՝ գինուն, շեշտում են հենց դրա զբաղի տեսակարար կշիռը ներքին առևտրում:

Շուկա հանվող ապրանքների երկրորդ մեծ խումբը արհեստագործական ապրանքներն էին: Գառնիի հնագիտական պեղումները թույլ են տալիս այդ մասին ավելի մանրամասն խոսել: Գառնիի XIII—XIV դդ. թվագրվող շերտերում երևան են գալիս խեցեղենի նոր տիպեր, որոնք մինչև XIII դ. երկրորդ կեսը Հայաստանում տարածված չէին կամ նոր էին սկսել տարածվել: Հասարակ խեցեղենում տեղի ունեցած փոփոխությունները հատկապես ցայտուն են արտահայտված փոքր ծավալի անոթների վրա: Դրանք կարմիր փայլեցումով նախազարդված բարակապատ թասեր և պնակներ են: Փայլեցումը կատարված է պարուրած և գոտիներով, թեք և ուղղաձիգ գծերով, ցանցերով: Կարմիր փայլ-

³⁹ Ստեփանոս Օրբելյան, էջ 339:

⁴⁰ Տե՛ս «Գառնի», էջ 37—44, Բ. Ն. Առաքելյան, Խաղողի վերամշակումը միջնադարյան Հայաստանում (Ենուլթեր Հայաստանի գյուղատնտեսության և գյուղացիության պատմության, հ. 1, Երևան, 1964, էջ 154—159):

⁴¹ Որ սամղան որպես առևտրահարկ (իսկ Հովհաննեսի և Վանականի արձանագրությունում զա նշված է հստակորեն) համապատասխանում է բաժին, առաջին անգամ մատնացույց է արել նշանավոր արևելագետ Վ. Վ. Բարտոլդը (տե՛ս В. В. Бартольд, Персидская надпись на стене анийской мечети Мануче, Анийская сержа, № 5, СПб., 1911, с. 33):

չեցումով անոթները հարդարելը ինքնին նորույթ չէր, սակայն եթե նախորդ շրջանում այն կիրառվում էր ընդհանուր ֆոնը կամ նրա զգալի մասը պատելու համար, ապա գեղագիտական նոր մոտեցումը կարմիր փայլեցումն օգտագործում է որպես առանձին նախազարդող տարր՝ տարբեր հորինվածքներով այն ցրելով չփայլեցված ֆոնի վրա: XIII դ. երկրորդ կեսից Հայաստանում սկսվում է նաև ենթաշնարակային նկարազարդումով խեցեղենի մասսայական արտադրությունը, որը մի շարք նոր տեխնոլոգիական տեղաշարժերի արդյունք էր⁴², Գառնիում այդ խեցեղենը ներկայացված է մեծ բազմազանությամբ՝ ներառնելով ինչպես նոր տեսակի հումքեր, այնպես էլ նոր տեսակի շնարակ, ներկեր, նախազարդման նոր ոճեր: Դրա զգալի մասի տեղական լինելը ապացուցում են թրծման հենակները, տեղական խեցին, զարդերի որոշակի տեղայնացումը, վարպետների տեղական նշանները⁴³: Այսպիսով, շնայած առայսօր Գառնիում խեցեգործական արհեստանոցներ չեն գտնվել, բայց փաստերը անվիճելի են դարձնում տեղում այն արտադրելու իրողությունը:

Արհեստագործական արտադրանքը ներառնում էր նաև պղնձագործության արդյունքները: Գառնիի XII—XIV դդ. շերտերում գտնվել են մի շարք պղնձե ձուլածո և կռածո իրեր: Դրանք խոր, կիսագնդաձև թասերի բեկորներ են, առանց լրացուցիչ հարդարման կամ փորագիր նախշերով, սուր և երկար ջթիկներով ճրագներ, սափորների մասեր: Զգալի թիվ են կազմում ձուլածո փոքր խաչերը: Դրանցից մեկի վրա պահպանվել է արձանագրության մի մասը: Վերջինս թերևս պատրաստվել է պատվերով⁴⁴: Որոշակի թիվ են կազմում XII—XIV դդ. պատկանող մատանիները, մանր զարդերը: «Պղնձե կռածո և ձուլածո իրերի մեծագույն մասը իր ընույթով այնպիսին է, որ չի կարող բերված լինել ուրիշ քաղաքներից, այլ պատրաստվել է տեղում և ցույց է տալիս պղնձագործական արհեստի տարբեր ճյուղերի առկայությունը միջնադարյան Գառնի գյուղաքաղաքում»⁴⁵:

Պեղումների արդյունքները անտարակուսելի են դարձնում ապակյա որոշ իրերի (առաջին հերթին ապարանջանների, բաժակ-դամպարների) վաճառքը գյուղաքաղաքում: XII—XIV դդ. շերտերում հաճախ են հանդիպում նաև փիրուզագույն սմալտայից պատրաստված ապարանջանների, մատանիների բեկորներ, հախճապակյա ուլունքներ: Սակայն Գառնիում այս ամենի արտադրության նշանների բացակայությունը թեևկան է դարձնում դրանք տեղական արտադրանքի տեսակական մեջ դասելու հարցը: Սովորական էր նաև երկաթյա բազմաձև գամերի, պայտերի, շիթաների և այլ մանր իրերի արտադրությունը: Այսպիսին է ապրանքների այն մոտավոր, ոչ լրիվ տեսականին, որ կարող էր առաջարկել գյուղաքաղաքի ապրանքային արտադրությունը: Բնականաբար, մենք չանդրադարձանք մի շարք արհեստների (որմնադրություն, զինագործու-

⁴² M. S. Dimand, A Handbook of Muhammadan Art, New York, 1958, p. 178—179; A. Lane, Early Islamic Pottery, London, 1958, p. 45—46; Э. В. Сафко, Среднеазиатская глазурированная керамика XII—XV вв., Душанбе, 1969, с. 21—22, 39—40.

⁴³ Խեցեղենի այս խմբերի տեղական լինելն առաջինը նշել և դրա օգտին փաստեր է բերել Գ. Լ. Կարախանյանը (տե՛ս «Գառնի», էջ 94—97, նաև Ա. Ժամկոչյան, Հայաստանի XIII դ. վերջի և XIV դ. հախճապակին («Պատմա-բանասիրական հանդես», 1975, № 1, էջ 230—239):

⁴⁴ Արձանագրության պահպանված մասը հետևյալն է. «Կոտանտին/], զխալո կազմեց յիշատակ Վարդուտին. ած ողորմի զա...»: Պատվերով արհեստագործական իրերի պատրաստումը պիտի որ լայնորեն տարածված լիներ հատկապես գյուղաքաղաքում, որտեղ պահանջարկն ավելի սահմանափակ էր: Ուշադրով է, որ պատվերով աշխատող արհեստավորների մասին հատուկ հոդված ունի Մխիթար Գոշը (տե՛ս Մխիթար Գոշ, էջ 148): Դժբախտաբար պեղումներից հայտնաբերված նյութերի մեջ հաճախ անհնար է առանձնացնել անհատական պատվերով պատրաստված առարկաները:

⁴⁵ «Գառնի», էջ 60—61:

թյուն, պայտարութիւն և այլն), որոնց առկայութեան օգտին կարելի է փաստեր բերել, բայց դրանք անմիջապէս կապված չեն շուկայի հետ: Քննարկվող ժամանակաշրջանում Գառնին առևտրական սերտ կապեր ունէր Անիի հետ: Բացառված չէ ենթաշնարակային նկարագրողումով խեցեղենի որոշ մասի, ապակյա իրերի ներմուծումը Անիից: Գառնիի նյութերի մեջ առանձնանում են հախճապակյա անոթների և հախճասալերի մի քանի խմբեր, որոնք ներմուծվել են Քաշանից և Սուլթանաբազի շրջանից: Հետաքրքիր տվյալներ կան նաև Ոսկե Հորդայի մերձվոլգյան քաղաքների հետ Գառնիի ունեցած առևտրական կապերի մասին:

Գյուղաքաղաքի ընդգծված երկրագործական բնույթը իր դրոշմն էր դնում ապրանքային արտադրութեան վրա, որի հաշվեկշռում առաջնակարգ տեղ էին գրավում ոչ այնքան արհեստագործական, որքան երկրագործական-անասնապահական մթերքները: Գյուղաքաղաքի շուկան իրեն էր ձգում շրջակա գյուղերի բնակիչներին, որոնք այստեղ կարող էին վաճառել ինչպես երկրագործական, այնպես էլ տնայնագործական արտադրանքի բազմազան իրեր, ձեռք բերել գյուղաքաղաքում արտադրված և այլ քաղաքներից բերված արհեստագործական իրեր:

Որոշ փաստեր հնարավորութիւն են տալիս խոսելու նաև տեղում առևտրի կազմակերպման մասին: Խոսքը վերաբերում է Հովհաննեսի և Վանականի արձանագրութիւնում հիշատակվող տամղատարներին՝ շուկայական և հարկային վերահսկիչներին: Տամղատարները տեղական իշխանների (տվյալ դեպքում Զաքարյան) պաշտոնյաներն էին գյուղաքաղաքում: Դա հավաստում են արձանագրութեան մեջ տեղ գտած «վասն մեր պարոնացն յերկար կենդանութեան», «ի մեծ պարոնաց խոռովութիւն] անգանի» արտահայտութիւնները: Մխիթար Գոշը «Յաղագս դատաստանաց վաճառաց» հոդվածում վկայում է ավան-գյուղաքաղաքներում ոչ միայն շուկայի գոյութեան մասին, այլև տալիս է շուկայի վերահսկիչ-պաշտոնյաների պարտականութիւնների հստակ ձևակերպումը: «Եվ վաճառք ըստ հրամանի թագաւորաց եթէ ի քաղաքս կամ յաւանս կամ յայլ ինչ տեղիս ի գաւառս... Կարգեսցեն եւ կոփիչս միշտ որոնել և տեսանել, զի մի նենգութիւն ինչ արասցեն»⁴⁶, Տամղատարները հսկողութիւն էին սահմանում նաև արտադրական կառուցների՝ շրաղացների, ձիթհանների և արհեստանոցների վրա⁴⁷:

Գառնիում լայն ծավալ ստացած առևտրի օգտին է խոսում նաև XIV դ. 30—50-ական թթ. այստեղ գործած դրամահատարանի փաստը: Գառնիում կտրված դրամներ են գտնվել Երևանի մոտ⁴⁸, Տավուշում (Թովուզ), Բաքվում⁴⁹:

Առանձնահատուկ ուշադրութեան են արժանի արձանագրական այն տեղեկութիւնները, որոնք վերաբերում են գյուղաքաղաքի կառավարմանը: Այդ սանդղակում, ինչպես տեսանք, կարևոր դիրք էին գրավում տամղատարները: Թվում է, որ գյուղաքաղաքի ներքին կառավարման հիմնական ֆունկցիան կատարում էր տանուտերերի խորհուրդը: Տանուտերերի մասին միակ վկայութիւնը պահպանվել է Հովհաննեսի և Վանականի արձանագրութիւնում: Վերջիններս նշում են, որ հարկերը հօգուտ Սունպենց վանքի վերացրել են «մեր տանուտեր/ացս բանիւ. Կարապետին, Ածատրո/», Խոյտամին, Ասխաթանա, Ամէնատ/րոյ/], Միքէլին, Սէթին, Վարդին, Մէլիք[ը]/անին եւ այլ մեծ ու փոքր տանուտեր/ացս]...»: Այս հատվածը ցույց է տալիս տանուտերերի և տամղատար-

⁴⁶ Մխիթար Գոշ, էջ 148:

⁴⁷ Վ. Վ. Բարտոլդը տամղայի մասին գրում է. «տամղայի» տակ դրանից (բաժին—Հ. Պ.) բացի հասկանում էին բոլոր այն հարկերը, որ հավաքում էին քաղաքներում առևտրաարդյունաբերական հիմնարկներից, ներառյալ հասարակաց տները» (տե՛ս В. В. Бартольд, *Узл. шаг.*, էջ 34):

⁴⁸ Е. А. Пахомов, Монетные клады Азербайджана и Закавказья, Баку, 1926, с. 56.

⁴⁹ Е. А. Пахомов, Клады Азербайджана и других республик и краев Кавказа, вып., II, Баку, 1938, с. 38—40.

ների միջև մի փոխառնչություն, որն արտահայտված է «տանուտերաց բանի» կապակցությամբ: Տամդատարները հարկերը վերացրել են տանուտերերի խոսքով կամ հավանությամբ: Արդյոք սա չէ՞ր նշանակում, որ տանուտերները համայնքի անունից ինչ-որ փոխհատուցում էին խոստանում տամդատարներին⁵⁰ և որպես վկաններ բերվում են նրանցից իննի անուններն ու ավելացվում, որ այդ գործարքը բոլոր մեծ ու փոքր տանուտերերի «բանի» է: Արձանագրության սկզբնամասում սվասն մեր պարոնացն յերկար կենդանութեան» (և ոչ թե հրամանով) արտահայտությունը և կապալի հիշատակումը («թէ ոք... յայս կապալիս վերա լինի») վերջնամասում տարակույս չեն թողնում, որ տամդատարները դյուղաքաղաքի ողջ հարկը կամ նրա մի մասը վերցրել էին կապալով⁵¹:

Տանուտերերի ինստիտուտի մասին քննվող ժամանակաշրջանում բավականաչափ տեղեկություններ կան, սակայն դրանց մեծ մասը վերաբերում է գյուղերին: Միջնադարյան գյուղը սովորաբար ունենում էր մեկ տանուտեր, որը հաճախ հիշատակվում է նաև «գեղջավազ», «ռեխ», «դեմեթար» տերմիններով⁵²: Քաղաքներում և գյուղաքաղաքներում արդեն գործ ունենք տանուտերական խորհրդի հետ: Դեռևս XIII դ. սկզբի Գեղարդի մի արձանագրության մեջ կարդում ենք. «Սն Դոյս և Երևանո տանուտերքս և պարոնայքս...»⁵³: Անիի Մանուչի մզկիթի վրա փորագրված Աբու-Սաիդի պարսկերեն արձանագրությունը (XIV դ. 20—30-ական թթ.) հայտնում է, որ ծանր հարկերի պատճառով «...տեղանքը (Անին և շրջակայքը—Ղ. Պ.) սկսեց ամայնալ, հասարակ ժողովուրդը ցրվեց, քաղաքի և շրջանի տանուտերերը (պարսկերեն տեքստում՝ քեղխուդա—Ղ. Պ.) կալանի և դռնագրի պատճառով թողեցին իրենց անշարժ և շարժական ունեցվածքը, ընտանիքները և հեռացան...»⁵⁴: Վ. Վ. Բարտոլդե հավանական է համարել, որ այստեղ հիշվող տանուտերերը քաղաքի առանձին թաղամասերի գլուխ կանգնած թաղապետներն են⁵⁵: Միակաման գյուղաքաղաքից հայտնի են երկու արձանագրություններ, տանուտերերի հիշատակությամբ. «...և այս գործոյս պատճառ շիրակալանցիք եղեն քահանայք և տանուտերք»⁵⁶, «հրամանալ պարոնացն... մեք Միրակավանիս տանուտերքս Խաչուտս և Մխիթարիս և քահանայքս...»⁵⁷: Հետաքրքրական է, որ 1462 թ. Մարմետ գյուղաքաղաքում գրված մի հիշատակարանում նշվում են գյուղաքաղաքի 30 տանուտերերը⁵⁸: Ինչպես տեսանք, Գառնիում դրանց թիվը իննից ավելի շատ էր: Այս փաստերը ցույց են տալիս, որ տանուտերական խորհրդի մեջ միայն թաղապետները չէ, որ մտնում էին: Դժվար է ենթադրել Գառնիում իննից ավելի, իսկ Մարմետում 30 թաղերի գոյությունը: Բ. Ն. Առաքելյանի տեսակետը, որ ըստ այլևս թիվի տանուտեր բաղադրում անվանվում էին ոչ միայն թաղապետները, այլև քաղաքի ուրիշ մեծամեծները...»⁵⁹, սովյալ ղեպքում տարածելի է նաև Գառնի գյուղաքաղաքի վրա: Վերոբերյալ արձանագրական տեղեկություններից կարելի է նաև մակա-

50 Համանման ակնարկ պարունակում է նաև Միրակավանի մի արձանագրությունը (տե՛ս «Վիմական տարեգիր», էջ 247, լ. 2. Բ ա բ ա յ ա ն, Հայաստանի սոցիալ-տնտեսական և քաղաքական պատմությունը XIII—XIV դդ., Երևան, 1964, էջ 485):

51 Հարկը կապալով վերցնելը քննվող ժամանակաշրջանում բավական տարածված երևույթ էր (տե՛ս «Հայ ժողովրդի պատմություն», հ. III, Երևան, 1976, էջ 664—665, լ. 2. Բ ա բ ա յ ա ն, նշվ. աշխ., էջ 447—448):

52 «Վիմական տարեգիր», էջ 50, 52, լ. Խ ա շ ի կ յ ա ն, Մատթեոս Ջուղայեցու կյանքն ու մատենագրությունը (Բբանբեր Մատենադարանիչ, № 3, 1956, Երևան, էջ 73), և ու լ յ ն ի՝ XIV—XV դդ. հայկական գյուղական համայնքի մասին («Պատմա-գանասիրական հանդես», 1958, № 1, էջ 110—112):

53 Գ. Հ ո վ ս ե փ յ ա ն, Խաղաքայինք..., էջ 319:

54 В. В. Бартольд, նշվ. աշխ., էջ 7:

55 Նույն տեղում, էջ 44:

56 «Վիմական տարեգիր», էջ 247:

57 Նույն տեղում:

58 Լ. Խ ա շ ի կ յ ա ն, XIV—XV դդ. հայկական գյուղական համայնքի մասին, էջ 116:

59 Բ. Ն. Առաքելյան, Քաղաքները և արհեստները..., հ. 2, էջ 158:

բերել, որ տանուտերական խորհուրդը ընկալվալի ներքին հարցերը լուծելիս հանդես է բերում որոշ ինքնուրույնություն:

Գառնի գյուղաքաղաքում կար նաև դատավոր, որի իրավասությունների մասին տեղեկություններ չունենք: XIII—XIV դդ. մի խաչքար-տապանաքարի վրա կարգում ենք. «ՁԳադիկ դատատերն և զԳուրճի յաղալի յիշեցեք»⁶⁰: Կարելի է նշել միայն, որ տվյալ դեպքում գատավորը հոգևորական չէր:

Միջնադարյան գյուղաքաղաքի տնտեսամշակութային և սոցիալական կյանքի քննության գործում սյու արձանագրությունների դերն անվիճելի է, մասնավանդ, երբ հնարավոր է լինում դրանք համադրել մատենագրական և հնագիտական նյութերի հետ: Այս քննությունից կարելի է կատարել մի քանի եզրահանգումներ:

1. XIII դ. 2-րդ կեսին և XIV դ. Գառնիում զգալի ծավալ էր ստացել ապրանքային արտագրությունը, որի մեջ երկրագործական մթերքների հետ միասին կարևոր դեր էին խաղում արհեստագործական ապրանքները: Գյուղաքաղաքը վեր էր ածվել առևտրական նշանակալից կենտրոնի: 2. Գյուղաքաղաքի արևտեսության մեջ զգալի դիրք ուներ եկեղեցին, որն ակտիվորեն մասնակցում էր ծավալված առևտրին և առատորեն օգտվում զանազան արտոնություններից: 3. Գյուղաքաղաքի ներքին կառավարումը գտնվում էր տանուտերերի խորհրդի ձեռքին, որը որոշ հարցեր լուծում էր ինքնուրույնաբար:

Մոնղոլական արշավանքի հետևանքով Հայաստանի մի շարք խոշոր քաղաքներ կործանվեցին, մնացածներն էլ բռնեցին աստիճանական բայթյաման ուղին: Այս պայմաններում տնտեսամշակութային կյանքը փոխադրվում էր ավելի փոքր կենտրոններ, որոնցից մեկն էլ Գառնին էր: Սակայն նոր պայմաններում Գառնին չվերածեց քաղաքի, արհեստավորական արտադրանքն իր վերջին և համեատ ծաղկումն էր ապրում: Իլխանական պետության վարած տնտեսական քաղաքականությունը, որի մեջ Ղազան խանի բարեփոխումները միայն մի շահադրված դրվագ էր, անուղղակի ծանր հարկերը, սովորական դարձած ավարատություններն ու ավերները պիտի որ շուտով կասեցնեին այդ զարգացումը⁶¹: Ով իսկապես, ինչպես ջուլց են ասլիս պեղումները, լենկ թեմուրի արշավանքից հետո Գառնին աստիճանաբար կորցնում է գյուղաքաղաքի իր նշանակությունը:

НЕКОТОРЫЕ НАДПИСИ ИЗ ГАРНИ В ИСТОРИКО-АРХЕОЛОГИЧЕСКОМ АСПЕКТЕ (XIII—XIV вв.)

ГАМЛЕТ ПЕТРОСЯН

Резюме

Для комплексного историко-археологического изучения средневекового Гарни определенную ценность представляют надписи, высеченные на архитектурных памятниках поселения. На основе анализа текстов этих надписей и их сопоставления с данными письменных источников и археологическим материалом выявляются некоторые стороны экономической и социальной жизни средневекового Гарни: товарное производство, его ассортимент, основные черты организации торговли, а также структура внутреннего управления поселения.

⁶⁰ Խաչքարը գտնվում է Գառնիի ձիթհանի պատի մեջ:

⁶¹ «Հայ մոզովրդի պատմություն», հ. III, էջ 640, 659—662: